

四庫全書

集部

欽定四庫全書

集部

宋詩鈔卷八十五至
七

詳校官中書_臣賈 錢

主事銜_臣徐以坤覆勘

總校官編修_臣王燕緒

校對官中書_臣劉源溥

騰錄監生_臣鄭家屏

欽定四庫全書

宋詩鈔卷八十五

內閣中書舍人吳之振編

翁卷韋碧軒詩鈔

翁卷字靈舒永嘉四靈之一蓋四人因卷字靈舒故
遂亦以道暉為靈暉文淵為靈淵紫芝為靈秀云

思遠客

涉夏思已深感秋念愈迫思念皆為誰為彼遠行客客

行曷辰休悵望朝復夕出門虛有待命駕焉所適邈邈
阻前歡悠悠抱今戚中庭一株橘嘉實轉金碧爰意花
開時花邊語離析惜此不忍餐留之候君摘擬君君未
來回腸更如折何當乘夢時儻遂徽容覲

送劉幾道

束髮同執經交分人莫如我愚百無成蹭蹬空林居君
文最奇屈二十魁薦書青衫何太晚警捕殊區區是月
蟬始鳴秀色連郊墟倣裝趨海邑指期當憩車老大戀

親友暫別猶歔歔況此一分手歸期三載餘積雨山川
晦新晴氛霧除殷勤送客吟撿執行子裾願言乘高風
矯翮凌大虛

山中採藥

巖崖產靈藥等閒人顧稀採掇獲所願躋登倦忘歸沃
葉帶露滋深根涵土肌妍光媚幽笈芳氣盈我衣濯以
清澗泉曝之太陽暉製治擬如法服食從所宜除疴養
天和仙方豈吾欺協彼古修意庶用延將衰將衰儻得

延萬事焉足為

酬友人

常憂別時數每苦歡事疎矧茲同心人契濶三月餘昨日攜瘦藤往訪林間廬差池不一見出門恨何如今晨蒼僮來贈言委璫璵吟玩弗忍釋絢彩搖衿裾子有供世才胡為未展舒我無資身策合守貧賤居積疴困疲繭焉得愁悶除慙勤荷久要尚肯念到予南枝早梅白古澗寒流虛明當復相尋行游帶琴書嚼花飲芳泉哦

詩更躊躇

白紵詞

翩翩長袖光閃銀綉羅帳密流香塵歌分四時舞一色
淥觴傳處馳金輪急竹繁絲互催逼吳娘嬌濃玉無力
呵星喚月留夜長十二圍屏暖山色

送陳郎中知嚴州

頻年經虎害人望使君來地重分旄節州清管釣臺涼
天星象動吉日印符開帝擢平津策曾知有用才

寄趙靈秀

千山落葉深高樹不藏禽
游子在何處故人勞此心閒
燈妨遠夢寒雨亂愁吟
僧甕曾相約花時共一尋

送人赴沅州任

舊曾包茅地中存古意長去程
逢嶽雪上事帶春陽霧
結硃砂氣波流白芷香
大夫祠寂寞煩與奠椒漿

悼雪庵禪師

悟了無生妙歸空若故鄉
竹房三尺像石榻一爐香
壞

衲猶懸樹新松忽過牆僧中留不得幾日為淒涼

寄沈洞主

想當清夜醺帶月叩仙鐘指上雷霆訣庵前虎豹蹤藥
收陽地草薪採故枝松擬即尋師去茅峰疊幾重

晚秋送徐璣赴龍溪丞因過泉南舊里

卷中風雅句名匠亦難如遠邑親微祿他鄉過舊廬程
途多見菊行李半擔書未信文明代無人薦子虛

即事言懷

賦得拙疎性合令蹤跡賒相親惟野客所論是詩家聽
雨眠僧屋看雲立釣槎秋來有新句多半為黃花

寄遠人

秋氣日淒清秋衣紉未成在家猶不樂行路若為情幾
處好一作看山色暮天羣一作聞雁聲分明相憶夢夜夜出

江城

太平山讀書奉寄城間諸友

寥寥鐘磬音永日在空林多見僧家事深便靜者心虛

庭雲片泊側徑石根侵

一作幽泉來鷺浴積翠隔蟬吟

此去城間遠君

應懶出尋

冬日過道上人舊房

已知超衆相假質任成灰房是他僧住門無舊客來冰
乾半池水花落一根梅猶自疑行脚何年見却回

送趙紫芝為江東從事

非惟篇翰奇吏道更深知山水六朝地登臨三考時泥
沙多舊物風日少全碑正屬黃花發愁聞有別離

春日和刘明遠

不奈滴簷聲風回昨夜晴一堦春草碧幾片落花輕知
分貧堪樂無營夢亦清看君話幽隱如我願逃名

送薛子舒赴華亭船官

君到雲間日應分二陸名縣圖山色少井味海潮并剡
局三年印春風半月程野人因買鶴曾向此中行

送包釋可撫機

州帶福星明君今去指程亂山秋雨後一路野蟬鳴時

靜軍書少人閒官況清歸來話風土盡識荔枝名

送趙嗣勳

休思孤嶼峰且往看吳中一片太湖色遠涵秋氣空藕塘南北棹蘆港去來鴻入幕多僚屬惟君事不同

過太湖

水跨三州地蘇州水最多昔年僧為說今日自經過亡國豈無恨漁人休更歌洞庭山一抹翠靄白雲和

信州草衣寺

簷多山鳥啼山外玉為溪林樹若又長塔峰應更低數
僧歸似客一佛壞成泥宴坐當時事廊碑具刻題

宿鄔子寨下

已謁龍君廟明朝早過湖傍沙船盡泊經火地多枯秋
至昏星易空長楚月孤蕭條村戍內更點有如無

同趙靈芝杜子野遊豫章總持寺

蒲寺是秋風吹開黃菊叢重林無日到此地若山中罷
磬孤僧出看碑兩客同相傳化龍事神怪理難通

醉杜子野

千葩開欲休，獨客思悠悠。
江水能相隔，春風不共遊。
數篇詩未答，一幅信重收。
多少懷君意，鶯聲高樹頭。

贈張亦

興兵又罷兵，策士耻無名。
閒見秋風起，猶生萬里情。
借窓臨水歇，沽酒對花傾。
示我新詩卷，如編衆玉成。

寄葛天民

常日已清癯，那兼疾未除。
傳來五字好，吟了半年餘。
鐵

柱仙人觀梅花處士廬江湖正相隔歲晚更愁予

曉對

獨對曉來晴天寒景物清梅花分地落并氣隔簾生曾
是吟招隱何時遂耦耕蕭疎頭上髮已白二三莖

暮春病歸

朝朝風景添吾病亦開簾洗藥花前曬傳方壁上黏力
微還省語身老更看髯昨日林僧至茶杯始一拈

送徐靈囿永州司理

君向零陵日分攜又雪天地遙行幾郡官小度三年蘭
芷芳條潔瀟湘翠色連從來苦吟思歸賦若多篇

中秋步月

幽興苦相引水邊行復行不知今夜月曾動幾人情光
逼流螢斷寒侵宿鳥驚欲歸猶未忍清露滴三更

寄永州徐三掾曹

聞說居官處千峯近九疑合流皆楚水高石半唐碑香
草寒猶綠清猿夜更悲其中多隱者君去得逢誰

書隱者所居

百事已無機空林不掩扉
蜂沾朝露出鶴帶晚雲歸
石老苔為貌松寒薜作衣
山翁與漁父相過轉依依

送吏公抄化

一錫出林去風霜前路寒
自言緣事了方得此身安
飄葉隨禪步饑禽傍野餐
舊房惟有佛開着任人看

能仁寺

芙蓉峰入天寺與此峰連
得見是冬月要來從昔年
寒

潭威塔影古木帶厨煙偶值高僧出禪牀坐默然

贈東菴約公

問今年八十退院久清閒白雪髭慵剃青松戶早關取
泉來煮茗與客話遊山弟子何僧是緇衣多往還

石門菴

山到極深處石門為地名嵐蒸空寺壞雪壓小庵清果
落羣猿拾林昏一虎行山僧何所得高坐若無情

寶冠寺

山多猿鳥羣永日絕鷺氛一澗水流出幾房僧共聞挂
筇黏落葉拂石動寒雲誰昔來營此尋碑看記文

寄山友徐靈暉

若非殊俗好那有愛幽居深徑無來客空山自讀書樹
蟬經雨少門柳望秋疎相憶何時去閒園共爾鉏

陳西老母氏挽詞

八十餘年壽孀居備苦辛成家無別物有子作詩人遠
客移書吊新墳得佛鄰秋堂挂遺像癯若在時身

哭徐山民

已是窮侵骨何期早喪身分明上天意磨折苦吟人
花色連晴晝鶯聲在近鄰誰憐三尺像猶帶瘦精神

秋日閒居呈趙端行

閒居觀物化幾葉又飛東清氣全歸月寒聲半是風
病多憐骨瘦吟苦笑身窮折得鄰家菊還思靖節翁

送姚主簿歸龍溪

三考今批足應無愧此心只將零月俸買得一張琴
歸

處路遊遠到時冬必深邑丞詩極好閒暇可相尋

送蔣德瞻節推

八百里重湖長涵太古波君山雲出少夢澤雨來多才
子今方去名樓必屢過楚辭休要學易得怨傷和

贈滕處士

識君戎馬際今又十年餘環海纔安息先生便隱居清
風三畝宅白日一牀書長是閒門揜鄰僧亦不如

送趙明叔明府

隨行惟一琴前路足幽尋
今夜維舟處何村隔樹林
鴻聲秋浦冷雨氣海山深
若問三年政知君盡此心

初晴道中

初晴殘濕在衆樹碧光鮮
幽鷺窺泉立閒童跨犢眠
依山知有寺過水恨無船
石路是誰作姓名巖上鐫

福州黃蘗寺

天下兩黃蘗此中山是真碑
看前代刻僧值故鄉人
一宿禪房雨經時客路塵
將行更瞻禮十二祖師身

處州蒼嶺

步步躡飛雲初疑夢裏身
村雞數聲遠山舍幾家鄰
不雨溪長急非春樹亦新
自從開此嶺便有客行人

題武義趙提幹林亭

武陵諸勝狀如列在簷前
一部樓臺日數村桑柘煙
鳥啼春滿谷秧綠水平田
中有漁樵影吾詩詠不全

即事

省飲不成醉牢愁將奈何
晚煙雲半雜春雪雨相和
巷

濕人行少空寒雁叫多凭闌思無極懷古漫悲歌

贈鮑居士

日日湖波畔羣鷗相共閒全家皆好佛獨坐或看山
曬藥嫌雲在留僧帶月還有時乘小艇忽入到城間

哭徐璣

前時官上歸感愴失靈暉不料三年後俱隨萬化非
塔峰長入座池色自臨扉無復乘閒屐觀暮訪衲衣

贈孫季蕃

立談飛絮中相遇在吳宮以我為生拙憐君失計同醉
酣花落月吟苦竹搖風自作廬山記幽奇欲遍窮

周南仲挽詞

志以古人期今人焉得知學非無用處命自不逢時華
省官如夢閒居謗亦隨喪君於此日師友最相悲

寄張直翁

若向筠州去惟消一日寬又無他事阻自欲訪君難露
下秋山潔鴻飛楚水寒近詩凡幾首專待寫來看

贈劉高士

靈境康廬上師曾此處家
今游在京國誰為管煙霞
覓句行逢鶴持經坐對花
笑予非酒戶相勸滿甌茶

送劉成道

客中仍送客羸病若為心
沿路萬千景費君多少吟
出門梅雨滑浮棹浙河深
莫放旅愁起聞蟬思舊林

舟行寄趙端行

離亭一分手便逐釣船行
雖是暫相別那能忘此情
花

飛春已老雲散晚方晴詩句空吟得無人可共評

送人遊天台

暫遊行李少幾日到天台船帶落潮發月從前浦來花
源香不斷藥地綠成堆莫學他劉阮經年忘却回

送徐評事赴省試

早年通去後已是立朝身更道明經好須為擢第人馬
寒村驛暮燈暖帝城春花氣多時節高門有賀賓

友人林居

花石與林廬皆非俗者居鋪沙為徑軟因竹夾籬疎留
客同家食教兒誦古書常言治生意只欲似樵漁

京口即事

長江當下流鐵甕此為州前代多名迹聞人欲遍游夕
陽波上寺明月戍邊樓一曲漁家笛生予無限愁

贈熊鍊師

松邊自揜扉賣藥罷方歸教客認仙草笑人求紫衣惜
琴眠處放玩易語時稀見說沅砂賤閒身去欲飛

宿寺

一宿此禪宮身同落髮翁
深窓難得月老屋易生風
燈冷紗光淡香殘印篆空
獨憐吟思苦妨却夢西東

留別吳中諸士友

羈遊雖不閒幽思亦相關
今日經行處他宵夢寐間
松江雲在水茂苑樹成山
況復多吟客令人懶欲還

南澗尋韓仲止不遇

樹樹有佳色山蟬不住吟
掬來南澗水清若主人心
屋

上雲飛冷籬根蘚積深留詩在巖壁明日更相尋

秋居寄西里君

每日看山山上立滿山風日又秋來貧家歲計惟收菊
幽徑時常不掃苔新得酒方思欲試舊存吟軸見還開
涼天在處清如水能賦慙無宋玉才

鮑使君閒居

吟樓影在湖波上吟景長從望處生疊石擬成幽嶂色
種松移得遠灘聲多諳藥品曾因病却著荷衣欲避名

聞說近來心更靜
案頭惟有一琴橫

山中

山中凡事幸相宜
第一紅塵免上衣
尋藥每同丹客去
拾薪多趁牧兒歸
鳴泉漱石寒蒲潔
宿霧蒸泥早蕨肥
不奈隣峰學禪伴
時時來此叩巖扉

行藥作

病倦令人懶欲吟
偶因行藥過牆陰
煙生園柳暮鴉集
水涸池塘秋草侵
有口不須談世事
無機惟合卧山林

西風颯颯吹毛骨且看滿園花似金

寓南昌僧舍

突兀禪宮何代餘閒同衲客聽鐘魚身如野鶴栖無定
愁似頑藤挽不除舊隱定多新長竹遠交金之近來書
爐香碗茗晴窓下數軸楞伽屢展舒

留別南昌諸友

衰顏怕被青銅見病骨堪同瘦鶴羣出久併荒幽徑菊
未歸長憶滿山雲春風豈識吟人恨夜雨頻於客舍聞

萬柳百花好時節別君愁緒亂紛紛

送陳嘉父為彭澤主簿

昔時陶令彈琴縣今日君為主簿官地勝不嫌清俸薄
政公還得衆人歡江分九派潮常到嶽沓千峰夏亦寒
閑客欲遊遊未得畫成圖軸乞予看

次韻葛天民

接得詩來勝接書意君情思豁然舒却看城裏誰家竹
又鎖湖邊舊住廬曾有退之憐賈島豈無得意薦相如

欲知別後予蹤跡只向此間聞釣魚

贈陳管轄

一拂清風一袖雲紫陽容貌鶴精神詩因道進言辭別
丹得師傳火候真廬嶽峰前吟瀑布混儀圖上禮星辰
我來暫作閒人歇多謝仙翁相訪頻

寄筠州張錄事

每到友朋相會地未嘗一日不思君小詩曾托鄉僧寄
善政因逢故客聞山上仙蹤丹鼎在郭邊溪色布橋分

公餘若起吟遊興游處多應見白雲

次徐靈淵韻贈趙靈秀

一軸黃庭看不厭詩囊茶器每隨身
三年在任同仙隱
一日還家只舊貧種得溪蒲生似髮
教成野鶴舞如人
出門便是登山路更要遙山翠色勻

西風

一處西風一處愁又逢鳴雁在滄州
芙蓉不分秋蕭索
鬪折繁紅滿樹頭

雁池作

包家門外柳垂垂
搖蕩春風滿雁池
為是城中最佳處
每經過此立多時

馮公嶺

亂峰千疊拂雲霓
輻合坑崖立似梯
曾向梧州州裏望
衆山却是此山低

東陽路傍蠶婦

兩鬢樵風一面塵
採桑桑上露沾身
相逢却道空辛苦

抽得絲來還別人

山雨

一夜滿林星月白亦無雲氣亦無雷
平明忽見溪流急
知是他山落雨來

寄山人徐靈暉

只隔煙霞數里間本期還往共幽閒
寧知逸羽飛相背
我入山來君出山

還家夜同趙端行分韻賦

莫怪繁霜滿鬢侵
半年長路幾關心
還家點檢家中物
依舊清風在竹林

觀落花

纔看艷蕾破春晴
又見飛花點點輕
縱是閒花自開落
東風畢竟亦無情

寄張季思

荆吳中隔萬山遙
那得相逢話寂寥
長憶梅花好時節
訪君船泊古楓橋

題東池

一池寒水綠粼粼池上初梅白未勻誰念酒旗飛颭處
唐朝曾住作詩人

秋懷

不管秋天陰復晴秋懷何處不淒清江城幾夜無佳月
亦有新詩對雨成

野望

一天秋色冷晴灣無數峯巒遠近間間上山來看野水

忽於水底見青山

南塘即事

半川寒日滿村煙
紅樹青林古岸邊
漁子不知何處去
渚禽飛落拗罾船

鄉村四月

綠遍山原白滿川
子規聲裏雨如煙
鄉村四月閒人少
纔了蠶桑又插田

悼舊呈趙紫芝

憶向城南共說詩
山民與我定相隨
如今獨來還獨往
此恨除君人不知

宋詩鈔卷八十五

欽定四庫全書

宋詩鈔卷八十六

內閣中書舍人吳之振編

徐照芳蘭軒詩鈔

徐照字道暉永嘉人自號山民有詩數百斷思尤奇
皆橫絕歎起冰懸雪跨使讀者變蹕憖憖宵首吟嘆
不自已然無異語皆人所知也人不能道爾嘉定四
年卒

自君之出矣三首

自君之出矣
心魂遠相隨
折破唐人絹
經經是雙絲
自君之出矣
玉琴生塵垢
蓮子種成荷
曷時可成藕
自君之出矣
懶粧眉黛濃
愁心如屋漏
點點不移蹤

春日曲

中婦掃蠶蟻
挈籃桑葉間
小姑摘新茶
日斜下前山

莫愁曲

莫愁石城住
今來無莫愁
只重石城水
曾汎莫愁舟

三峽吟

山水七百里上有青楓林啼猿不自愁愁落行人心

蝗飛高

戰士屍上蟲蟲老生翅翼目怒體甲硬豈非怨氣激櫛
櫛北方來橫遮遍天黑戌婦聞我言色變氣咽逆良人
進戰死屍骸委砂礫昨夜魂夢歸白騎曉無迹因知天
中蝗乃是屍上物仰面久迎視低頭淚雙滴呼兒勿殺
害解繫從所適蝗乎若有知飛入妾心臆

妾薄命

初與君相知便欲肺腸傾只擬君肺腸與妾相似生徘徊幾言笑始悟非真情妾情不可收悔思淚盈盈

廢居行

北風蕭蕭邊馬鳴邊人走盡空戶庭黃金埋藏禾米棄路上逐日長飢行子西父南弗相守仰面看日啼無聲生身不合屬中土自昔無時無戰爭家桑椹熟生野蛾狂跳席箕田成坡一路幾州盡荒廢處處戰骨平草多

傳報將軍收塞土
取得山河奉明主
殘生只願還本鄉
難保後裔無兵禍

促促詞

促促復促促
東家歡欲歌
西家悲欲哭
丈夫力耕長忍飢
老婦勤織長無衣
東家鋪君不出戶
父為節級兒抄簿
一年兩度請官衣
每月請米一石五
小兒作軍送文
字
一旬一輪怨辛苦

征婦思

年半為郎婦郎去戍采石又云戍濠梁不得真消息半
年無信歸獨自守羅幃西風吹妾寒倩誰寄郎衣姑老
子在腹憶郎損心目願郎征戰早有功生子有蔭姑有
封

青鳩詞

勞勞復勞勞生人半行客今人行古道古道有行役相
逢莫等閒相離易疎隔殷勤紅杏花徹宵對芳席明年
花開人東西青鳩食花舊處啼

何所歸

苓箬下後灣
罽罽下前浦
遊鱗棲身更何所

柳葉詞

嫩葉吹風不自持
淺黃微綠映清池
玉人未識分離恨
折向堂前學畫眉

越魚吟

越魚生水中
專食水上禽
禽又安知魚
魚自生機心
越魚早來人
釣得人却放
之反不食

分題得漁村晚照

漁師得魚繞溪賣小船橫繫柴門外出門老嫗喚雞犬
收斂蓑衣屋頭曬賣魚得酒又得錢歸來醉倒地上眠
小兒啾啾問煮米白鷗飛去蘆花烟

宿翁靈舒幽居期趙紫芝不至

江城過一宿秋氣入霄濃蛩響移砧石螢光出瓦松月
遲將近曉角盡即聞鐘人起行庭際思君恨幾重

贈江心寺欽上人

客至啓幽戶
筍鞋行曲廊
潮侵坐禪石
雨潤讀經香
古硯傳人遠
新篁過塔長
城中如火熱
此地獨清涼

白下

白下嚴州近
崎嶇昔未經
年豐山米賤
溪澗石苔腥
一月無新句
千岑役瘦形
人家今畏虎
未晚戶先扃

贈劉明遠

一生嫌世俗
不向市中居
既是未攀桂
却堪同釣魚
疾除禪老藥
詩答野人書
又說成丹鼎
吾生愧不如

送塵老入廣化米開田

行李衝冰雪塗程半是船去從人乞米歸要海成田遇
景因開畫思茶亦掬泉好風名舶艣相候立江邊

送朱嚴伯

好別無愁思風霜一歲殘去因貧事迫歸有暮年安遠
水維舟晚青山遶舍寒有誰憐靜者得句不同看

途中

隻影微陽外青山自鬱盤未經千里遠欲寄一書難堠

碣苔侵字魚塘水過欄西風吹樹葉不問客衣單

還舊山作

雲駁天初霽攜兒下短篷數莖歸鬢白一袖俗塵空日
子差潮候秋容在蓼叢江神應念我平穩不生風

宿寺

古殿清燈冷虛廊葉掃風拚關人迹外得句佛香中鶴
睡應無夢僧談必悟空坐驚窓欲曉片月在林東

題江心寺

兩寺今為一僧多外國人流來天際水截斷世間塵鴉
宿腥林徑龍歸損塔輪却疑成片石坐對謝公身

題羅隱故居

片水靜無塵青山是四鄰上天如有意此地著詩人吟
得物俱盡罰令生世貧因來尋古跡只見石為麟

題桃花夫人廟

一樹桃花發桃花即是君空祠臨野水何處覓行雲事
迹樵人說爐香過客焚雨添碑上蘚難讀古詩文

送李偉歸黃山

心知無白髮長帶一琴行幾路到君屋數峰當郡城妻
兒貧自樂丹藥歲燒成未必聖明代終令隱姓名

懷如順上人

西湖湖上寺一別二三年舊住房長閉新栽樹已圓空
多相憶夢不得寄來篇喜見鄰僧說歸期是臘前

訪觀公不遇

卧犬聞人出門當青櫟林固知多不在自願欲相尋宵

短餘香印鄰疎出磬音昨來曾寄茗應念苦吟心

哭居塵禪師

今朝聞實信一隻海船遙此世永相隔何僧可與交
茶從秋後盡門絕月中敲昨夜山家夢親曾到石橋

衰柳

風吹無一葉不復翠成窠枝脆經霜氣根空入水波寒
栖江鷺早暗出野螢多廢苑荒堤外人嗟舊迹過

鷺鷥

一點白如雪頂黏絲數莖沙邊行有迹空外過無聲高
柳巢方穩危灘立不驚每看閒意思漁父是前生

登歙山寺

石徑半欹傾山頭路始平步因花樹息吟忘寺僧迎一
面門無水東隅路入京青峰三十六霜曉見分明

山中即事

着屐上崔嵬呼兒注瓦杯千岑經雨後一雁帶秋來野
艇乘湖發山園逐主開餘生落樵牧門巷少塵埃

題道上人房老梅

香有竹風知無塵
雜野姿為憐新
白髮重記舊題詩
蘇帶龍鱗剝蜂沾
蠹屑垂不來三十
載半樹是孫枝

石門瀑布

一派從天下曾經
李白看千年流不
盡六月地長寒灑
木跳微沫衝崖作
怒湍人言深碧處
常有老龍盤

宿永康

路有三千里春容
若未濃淺塘飢鷺
下晴靄市煙衝孤

望生還思頻過記昔蹤宿程知近縣聞打法燈鐘

題衢州石壁寺

岸石橫生脈平林一里溪衆船寒渡集高寺遠山齊殘
磬吹風斷眠禽壓竹低自嫌昏黑至難認壁間題

題信州趙昌甫林居

譜接江西派聲名過浙間棄官從早歲買屋向深山文
集通僧借漁舟載鶴還待予歸舊里又得到柴關

路逢楊嘉猷赴官嚴州

詩合誠齋意難將片石鐫相逢因在道惜別未移船野
步僧同坐宵吟吏廢眠思君還有夢前到釣臺邊

過鄱陽湖

港中分十字蜀廣亦通連四望疑無地孤舟若在天龍
尊收巨浪鷗小沒蒼煙未渡皆驚畏吾今已帖然

題薌林

祇為登山遠當門疊石為人來嗟故迹景勝入名詩立
鶴高過檻欹花半在池百年庭際木新長挂冠枝

宿吉州永慶寺

古邑溪邊寺，吟人愛寂寥。
少僧齋室廢，乞食釣鄉遥。
鐘韻含霜氣，樓簷近斗杓。
漢時銅鑄佛，瞻禮到今朝。

題浯溪

知是漫郎宅，舟中聞寺鐘。
小溪通正港，高石壓羣峰。
綠木成春蔭，荒臺見古蹤。
唐碑三十本，獨免野苔封。

永州書懷

嗜茶疑是病，羸瘦見詩形。
天斷征鴻過，汀多香草興。

高貧不覺身遠事皆經歸路當遊嶽僧言極可聽

湖中別鄧該

隔水鷓鴣鳴一汀香草生自怜為客久誰忍送君行後
會期何日歸途喜乍晴它春科甲上必欲見題名

筠州送趙院判歸九江

相逢今半月夜雨厭同聞遠地長為客還家極羨君詩
低勞盡寫茶羹許重分一馬衝寒去廬峰正雪雲

移家鴈池

不向山中住城中住此身家貧兒廢學寺近佛為鄰雪
長官河水鴻驚釣渚春夜來遊獄夢重見日東人

懷趙紫芝

一別一百日無書直至今幾回成夜夢獨自廢秋吟小
雪衣猶綰荒年米似金知音人亦有誰若爾知心

送爽上人化緣

專志事皆成期師此一行闍威靈佛像碑載施人名江
潤風催渡村深雪廢程暫勞曾共說終可送閒情

白石巖

一石入遥天，千峰疊在前。
人行不到處，仙去未多年。
竇暗雲生像，簷斜日照泉。
皇朝宣賜物，弟子尚能傳。

題薛景石瓜廬

何地有瓜廬，平湖四畝餘。
自鋤畦上草，不放手巾書。
人遠來求字，童閒去釣魚。
山民山上住，却羨水邊居。

壽昌道中

碣字芙蓉驛，喜行行不難。
路侵滄海過，人得異山看。
圓

石壕黏滿平途鷺立寒一遊期一月回日必冬殘

龍湫瀑布

飛下數千尺全然無定形
電橫天日射龍出石雲腥壯
勢春曾看寒聲佛共聽昔人云此水洗目最能靈

靈峰

我來無一語閒認昔遊蹤
誰種路旁樹却遮山上峰
潭乾沉石露人立去禽衝
樵說仙橋險因思在上封

石門庵

庵是何年作其中住一僧蒼崖從古險白日少人登衆
物清相映吾生隱未能夜來新過虎抓折樹根藤

題夏景清湘中閣

湘中山與水自古有人云此是曾遊地今來盡屬君殘
風吹岸草空廟入江雲却憶還鄉夢清猿半夜聞

題翁卷山居二首

十年前有約今却在城居羨爾能攜子深山自結廬引
泉移岸石栽藥就園蔬見說高林外樵人聽讀書

空山無一人君此寄閒身水上花來遠風中葉動頻蟲
行黏壁字茶煮落巢薪若有高人至何妨不裹巾

病中作

一行三步歇屋漏坐頻移妻欲藏茶鼎僧能施藥資鄰
園梅發盡河岸草生遲天解怜貧病難令不作詩

未迴車

山川匪遙遠行人未迴車欲語昨宵夢忽接今朝書啼
鳥在屋上綠草生庭除仰看日月光照知子衿裾

謝徐璣惠茶

建山惟上貢，采撷極艱辛。
不擬分奇品，遙將寄野人。
角開秋月滿，香入井泉新。
靜室無來客，碑黏陸羽真。

中夕

中夕獨依依，閒行未掩扉。
水邊山出月，松上雨沾衣。
棹響初如近，螢光漸欲稀。
不甘塵內事，長與此心違。

題丁少瞻林園

州分低嶺外，來向北園行。
路改初栽樹，堂成未有名。
藥

苗如草長巖溜入池青欲識懷君意時聞鶴一鳴

訪僧居

客至無他事房門不厭敲好山元帶郭損屋旋鋪茅靜
砌生靈藥高林出遠郊水禽多不見春暖漸營巢

永州寄翁靈舒

古郡百蠻邊蒼梧九點烟去家疑萬里歸計在明年風
順眠聽角樓高望見船筠州當半道長得秀詩篇

能仁寺

寺置有碑傳觀音巖石前殿高燈燭短山合磬聲圓牕
靜吹寒雪春鳴落夜泉清遊人豈識謂不似秋天

題李商叟半村壁

一徑蒼苔合連年不出門風高松有韻溪滿石無痕不
自知名重令人覺道尊更憂徵詔至移室向深村

訓翁常之

半掩柴門一徑深山中免見俗塵侵愁因有酒春生面
老不饒貧雪滿簷舊井遠通幽谷水翠

缺

小窓陰

扁舟莫負林間約，好把清詩慰此心。

贈從善上人

骨氣清冷無片塵，即應僧可是前身。
詩因圓解堪呈佛，碁與禪通可悟人。
掃地就涼松日少，煮茶消困石泉新。
不能來往城中寺，去買青山約我鄰。

山中寄翁卷

忽看春至復春還，門外烟雲沒野山。
吟有好懷忘瘦苦，貧多難事壞清閒。
柳花未散色全綠，杜宇乍啼聲更蠻。

聞到掃松溪雨後夢隨溪雨到巖關

送塵老歸舊房

數間茅屋殘山外
片石峻嶒樹影交
給假兩旬秋易盡
相尋一舍路非遥
盆栽怪木緣能畫
池畜珍魚不入庖
聞道水松三百步
夢隨流水到溪橋

會飲鮑使君池亭

案上一琴書數卷
不須此處有笙歌
厭居城市觀天小
喜到君家見月多
葉滿地飛隨步履
鶴於人熟聽吟哦

明朝也向山中去手把松枝養太和

宿翁卷書齋

一山秋色同誰看又復相尋出郭來
隣竹種成高礙月井泉汲少近生苔
忽驚寒事砧初動不辨晴光戶盡開
君愛苦吟吾喜聽世人誰肯重清才

同劉孝若野步

杖履相從步野田坐臨堦肥和詩篇
要看隔水人家菊試借繫門漁父船
且緩歸舟知有月不生酒興為無錢

寒來莫問家中事，纔得身閒即是仙。

訓贈徐璣

每到齋門敲，始應池禽雙戲動。
清波愛閒却，道無官好住。
僻如嫌有客，多字學晉碑。
終日寫詩成，唐體要人磨。
山民百事今全懶，祇合煙江着短莎。

高山寺晚望

石路近門方不險，刺桐疎處見僧歸。
小波重疊無平屋，四月陰寒尚袂衣。
山到道州高莫比，水分湘口綠相圍。

暮雲不隔東南望一片遙魚白鳥飛

題趙運管吟篷

飛塵難到碧波中波上烟雲盡不同吟斷不知鶯鷺起
汀花一半在船篷

舟上

小船停槳逐潮還四五人家住一灣貪看曉光侵月色
不知雲氣失前山

聞水

燈光難照客懷開
忽聽寒聲響似雷
天氣無風樹無葉
道州半夜水流來

杜甫墳

來陽知縣非知己
救厄無蹤豈忍聞
若更聲名可埋沒
行人定不弔空墳

題趙明叔新居

社壇側近地圖寬
所作園池在此間
十萬人家城裏住
少聞人有對門山

題張提舉西野

渡頭風景如前日
誰種桃花在兩邊
未晚人家門戶閉
鷺鷥閒立釣魚船

懷趙紫芝翁靈舒

紫芝別我天台去
翁十深山自結茅
但見春愁隨日長
不知庭葉蔽禽巢

李溪曲別鄭遇

七十二灘聲共聞
一朝路向李溪分
梅花無情動春夢

未好憶家先憶君

寄家書作

屋頭桑葉大如錢
知是吳蠶第一眠
遠水忽來瀟岸沒
家書却寄道州船

宋詩鈔卷八十六

欽定四庫全書

宋詩鈔卷八十七

內閣中書舍人吳之振編

徐璣二薇亭詩鈔

徐璣字文淵從晉江遷永嘉歷官建安主簿龍溪丞
武當長泰令嘉定七年卒年五十九初唐詩廢久璣
與其友徐照翁卷趙師秀議曰昔人以浮聲切響單
字隻句計巧拙蓋風騷之至精也近世乃連篇累牘

汗漫而無禁豈能名家哉四人之語遂極其工而唐詩由此復行曹能始以璣為照之弟按水心二徐墓誌既不同派而其詩卷亦各以名相呼有以知其不然矣

訪梅

訪梅行近郊寒氣初漸瀝欲開未開時三點兩點白清枝何蕭疎幽香况岑寂頗知天姿殊絕似人有德逢君天一方歡然舊相識

監造御茶有所爭執

森森壑源山
嫋嫋壑源溪
脩脩桐樹林
下蔭茶樹低
桐風日夜吟
桐雨灑霏霏
千叢萬枝龍
在水底吟鳳
在山上飛異
物呈嘉祥上
奉玉食資臘
餘春未新素
質蘊芳菲千
夫喏登壠叫
嘯風雷隨雪
芽細若針一
夕吐清奇天
地發寶秘神
鬼不敢知舊
制尊御膳授
職各有司分
綱製品目簿
尉監視之雖
有領督官焉
得專所為初
綱七七夸次
綱數弗差一
以薦郊廟二

淪賓夷天子且謙受他人奚可希奈何貪瀆者憑陵肆
姦欺品嘗珍妙餘倍稱來其私初作狐兒媚忽變狼虎
威巧計百不行叱怒面欲緋再拜長官前茲事非所宜
性命若螻蟻蠢動識尊卑朝廷設百官責任無細微所
守儻在是恪謹焉可違君一臣取二千古明戒垂以此
得重劾刀鋸弗敢辭移官責南浦奉命去若馳回首鳳
凰翼雨露生光輝

述夢寄趙靈秀

江水何滔滔渡江相別離
揖子家舍前對子衣披披
問子何所為旅舍未得歸
執手一悲歎驚覺妻與兒
起坐不得省清風在簾帷
平明出南門將以語所知
過子舊家處寒花出疎籬
蕭蕭黃葉多裊裊歸步遲
子去不早還何以慰我思

漳州別王仲言

百草各有種春至不栽培
交情重故知豈論才不才
相識十年初再見天之涯
共飲一杯酒粲若紅顏開
人生

有此樂知復能幾回契濶幾已深矧爾病興哀朔風從
何來吹發枝上梅天寒日欲暮又乃行色催君去江水
西我歸近天台東西道路長未可心膺摧明朝碧雲多
佇思良徘徊

投楊誠齋

名高身又貴自住小村深清得門如水貧惟帶有金養
生非藥餌常語是規箴四海為儒者相逢問信音

江亭臨眺

問得梅花信寒林動晚聲雨來山漸遠潮去水還清寥
落尋新句歡娛解宿醒相攜歸路滑燈火近孤城

同友人登翠麓亭

緩行循翠麓凝睇俯清灣舟揖蘆花外江山夕照間天
寒雖日短歲晚亦身閒高樹梅初發與君相共攀

中川別舍弟

中川人語別南國夜何其江迴風來急山低月落遲纔
從前浦遠角在古城吹五畝耕鋤地何當手共犂

冬日書懷

門庭黃葉滿園樹盡玲瓏寒水終朝碧霜天向晚紅蔬
餐如野寺茅舍近溪翁非是分囂寂由來趣不同

黃碧

黃碧平沙岸陂塘柳色春水清知酒好山瘦識民貧鷄
犬田家靜桑麻歲事新相逢行路客半是永嘉人

西征有寄翁趙徐三友

窮冬逆旅身薄宦此艱辛渡水添愁思看山憶故人煙

生村落晚雨過竹松新昨夜還鄉夢逢君苦未真

送趙靈秀赴筠州幕予亦將之湖外

郡以竹為名因知此地清溪來城下綠山到市邊平入
幕非無客能文必有聲江湖共游宦相望若為情

湘水

湘水幾千里平流少激湍數家分市井列石起巒豈
是昔曾到猶疑畫上看吟詩身漸老向此作微官

泊舟呈靈暉

泊舟風又起繫纜野桐林月在楚天碧春來湘水深官
貧思近闕地遠動愁心所喜同舟者清羸亦好吟

古郡

古郡依蠻楚身來作冷官老憐兄弟遠貧喜婦兒安分
菊來春雨移梅待歲寒又傳家信至入夜著燈看

憑高

憑高散幽策綠草滿春坡楚野無林木湘山似水波客
懷隨地改詩思出門多尚有溪西寺斜陽未得過

送徐照先回江右

骨體先如鶴離家歲已周
欲知詩思遠曾共楚鄉游
窮達身將老分携菊正秋
江西看舊友歸計少遲留

別趙黃中

世道難為友相期一見中
但令心事合不在語言同
秋早湘煙白舟移蓼岸紅
別懷如迥野長與水雲通

題陳待制湖庄

園無三畝地四面水連天
行向樓高處却如身在船
野

花春渚外山色海雲邊一任人來往茲懷亦浩然

寄陳西老

長日無吟伴閒庭佇物華竹枝斜帶雨草色淨侵沙
風度平生友隣居幾十家前曾乘小醉訪爾一甌茶

初夏遊謝公巖

欲取紗衣換天晴起細風清陰花落後長日鳥啼中
水國乘舟樂巖扉有徑通州人多到此猶自憶髯公

喜爽上人至

住與佛居近僧閒稍問詩湖山明月夜風露菊花時達
意言常省微吟步自遲老來朋舊少愛爾得相隨

曉

詩鬢曉星星霜天似水清風當窻眼入水向硯池生已
瘦梅花影猶乾竹葉聲夜來天地潔惟是月華明

題方上人房古梅房即故道書記所居

曾聽道公語先師愛此梅但知傳說老不記若年栽半
樹枯仍發疎花晚自開方兄頭又白常喜故人來

春日游張提舉園池

西野芳菲路春風正可尋
山城依曲渚古渡入脩林
長日多飛絮遊人愛綠陰
晚來歌吹起惟覺畫堂深

宿寺

古木山邊寺深松逕底風
獨吟侵夜半清坐雜禪中
殿淨燈光小經殘磬韻空
不知清遠夢啼鳥在林中

孤坐呈客

晨起猶孤坐餅泉待煮茶
寒煙添竹色疎雪亂梅花
獨

喜忘時事誰知改歲華多君能過此人里似仙家

送張主簿

上世喜同登論交建水清故人逢客裏明日又離情佳
闕東南少卑官遠近行秋風分手地霜葉滿江城

題石門洞

瀑水東南冠廬山未足論飛來長似雨流處不知源洞
裏龍為宅溪邊石作門修行謝康樂菴有故基存

春望

樓上看春晚煙分遠近村曉晴千樹綠新雨半池渾柳
密鶯無影泥新燕有痕輕寒衫袖薄杯酌更須溫

題薛景石瓜廬

近舍新為園澆鋤及晚涼因看瓜蔓吐識得道心長隔
沼嘉蔬潔侵畦異草香小舟應買在門外是漁鄉

寄趙端行

庭深自無暑苔徑復縈紆賓客不長到兒童亦可娛荷
花時帶粉蒲葉曉凝珠與爾城闔隔茲歡想不殊

山居

柳竹藏花塢茅茨接草池
開門驚燕子汲水得魚兒
地僻春猶靜人閒日更遲
山禽啼忽住飛起又相隨

夏日懷詩友

流水堦除靜孤眠得自由
月生林欲曉雨過夜如秋
遠憶荷花浦誰吟杜若洲
良宵恐無夢有夢即俱遊

臘日驪山渡逢故人

天寒多木葉愁思滿溪濱
惆悵往來渡經行多少人
時

金匱要略卷八十七
情猶重臘歲事每占春與爾他鄉旅誰當懷抱新

次韻劉明遠移家二首

隱居須是僻君向數家村自以閒為樂何嫌貧尚存碧
波連草舍白日掩柴門挂得一瓢在風來應惡喧
恬淡安身易新家似舊居逕涼行落葉池淨數游魚詩
得唐人句碑臨晉代書半生惟此樂同輩必無如

登信州靈山閣跨鶴臺

清遊吾有分渾似昔曾來野屋憑高住青山到水回欲

看靈岫遠須待曉雲開漸漸生愁思鄉心上古臺

題李商叟牛村堂

住居半依村先生氣象尊若非迎好客長是掩柴門覓
句行山影披蓑釣月痕固窮年八十惟得令名存

湘中

舊說湘中事身來又可尋廟存虞帝跡江照楚臣心為
客人俱遠題名刻自深春迴洲渚綠遙望正沉吟

書翁卷詩集後

五字極難精知君合有名磨礱雙鬢改收拾一編成泉
落秋巖潔花開野逕清漸多來學者體法似玄英

檄逄寄翁靈舒

聞道長溪令相留一館閒便令全近舍尚隔幾重山為
旅春郊外懷人夜雨間年來疎覽鏡怕見減朱顏

大龍湫

瀑水數千尺何曾貼石流還疑衆山拆故使半空浮霧
雨初相亂波濤忽自由道場從建後龍去任人遊

送瑞州張知錄

歲暮不惜別君行是宦遊江西多野水湖上正高秋舊
友曾過處新題必共留官閒可尋訪竹逕最深幽

寄舍弟

寄問安寧弟絃歌又一年流來溪水遠清到縣門前故
里人情樂新居物色鮮宦歸言話欵正及早梅邊

秋夕懷趙師秀

冷落生愁思哀懷得句稀如何秋夜雨不念故人歸蛩

響砌尤靜雲疎月尚微惟憐籬下菊漸漸可相依

登黃碧軒繼趙昌甫作

步陟高高寺徐行不用扶春晴又雨山色有還無句
向閒中覓茶因醉後呼所懷論未足何乃又征途

溪上

十日清溪上新春細雨天綠波隨棹起白鳥望舟眠麥
秀初如草雲濃半是煙却愁山路險明日捨溪船

梅坡

淺水低坡幾樹苔
冷光搖動玉塵埃
橫斜直似安排得
古怪多應折損來
潔白要須侵夜看
飄零却是被春催
閑來立斷清風影
一片飛香落酒杯

秋日登玉峰

玉琢孤峰歷富沙
人行峰頂步雲霞
溪流緩去幾回曲
樹色幽分無數家
翠拂寒煙平似水
紅飄霜葉遠如花
明朝重向城中望
對北孤峰應不差

壬戌二月

山城二月景如何行處時時聽踏歌
淡色似黃楊葉小
濃香如密菜花多
春容每到晴時改
天氣偏從雨後和
好向溪頭尋釣侶
小溪連夕漲清波

題東山道院

古院嵌嵌石作層
綠苔芳草近郊垌
溪流偶到門前合
山色偏來竹裏青
靜與黃蜂通戶牖
閒將白鳥共沙汀
道人亦有能琴者
一曲清徽最可聽

六月歸途

星明殘照數峰晴
夜靜惟聞水有聲
六月行人須早起
一天涼露濕衣輕
宦情每向途中薄
詩句多於馬上成
故里諸公應念我
稻花香裏計歸程

訪湖友

城中日月望南湖
乞得閒來訪隱居
漸有秋霖籬菊長
纔無暑氣渚蓮疎
壁間古畫多賢像
案上塵編半佛書
未見主人逢稚子
不通姓字獨踟蹰

登滕王閣

重重樓閣倚江干，岸草汀煙遠近間。
春水生時都是水，西山青外別無山。
雲歸長若真人在，風過猶疑帝子還。
自古舟船城下泊，幾人來此望鄉關。

贈趙師秀

薄宦歸來隔幾春，清羸還是舊時身。
養成心性方能靜，化得妻兒不說貧。
竹長新陰深似洞，梅添怪相老於人。
亦知曾見高人了，近作文章氣力勻。

贈徐照

近來圓覺境如何月冷高空影在波身健却緣餐飯少
詩清都為飲茶多塵居亦似山中靜夜夢俱無世慮魔
昨日曾知到門外因隨鶴步踏青莎

新春書事

出門閒步草萋萋桑柘陰中亦有蹊幾樹晴煙鶯囀早
一塘春水燕飛低空如陶亮官為令難學嚴陵住近溪
聖世幸時沾薄祿不能辛苦又攀躋

泊馬公嶺

維舟拂曉步平沙晚泊雲根第一家新取菜蔬沾野露
旋編籬落帶山花門前相對青峰小屋後流來白水斜
可愛山翁無一事藤牆西畔看蜂衙

酒

才傾一盞碧澄澄自是山妻手法成不遣水多防味薄
要令麴少得香清涼從荷葉風邊起煖向梅花月裏生
世味總無如此味深知此味即淵明

梅

是誰曾種白玻璃，
更絕寒荒一點奇。
不厭壠頭千百樹，
最憐窻下兩三枝。
幽深真似離騷句，
枯健猶如賈島詩。
吟到月斜渾未已，
蕭蕭鬢影有風吹。

過九嶺

斷崖橫路水潺潺，
行到山根又上山。
眼看別峰雲霧起，
不知身也在雲間。

春雨

斷橋橫落淺沙邊，
沙岸疎梅卧曉煙。
新雨漲溪三尺水，

漁翁來覓渡船錢

柳着輕黃欲染衣
汀沙漠漠草菲菲
晚風吹斷寒煙碧
無數鴛鴦溪上飛

夏日閒坐

無數山蟬噪夕陽
高峰影裏坐陰涼
石邊偶看清泉滴
風過微聞松葉香

丹青閣

翠靄空霏忽有無
筆端誰着此工夫
溪山本被人圖畫

却道溪山是畫圖

移官南浦作

簿領初為建水棲
移官南浦又沉迷
溪山轉處人煙隔
惟有黃鸝一樣啼

秋行二首

戛戛秋蟬響似箏
聽蟬閒傍柳邊行
小溪清水平如鏡
一葉飛來細浪生

紅葉枯梨一兩株
翛然秋思滿山居
詩懷自歎多塵土

金尺四庫全書
卷八十七
不似秋來木葉疎

建劍道中

雲麓煙巒知幾層一灣溪轉一灣清
行人只在清灣裏盡日松聲雜水聲

新涼

水滿田疇稻葉齊日光穿樹曉煙低
黃鸝也愛新涼好飛過青山影裏啼

新春喜雨

農家不厭一冬晴
歲事春來漸有形
昨夜新雷催好雨
疏畦麥隴最先青

春晚

午風庭院綠成衣
春色方濃又欲歸
蚪蚪散邊荷葉出
酴醾香裏柳綿飛

漳州圓山

輕煙漠漠霧綿綿
野色籠青傍屋前
盡說漳南風水好
衆山圍繞一山圓

新秋

新秋一雨洗林闌
晚色清澄滿望間
風靜白雲橫不斷
山前又疊一重山

五里牌邊

路繞山根石磴斜
小橋流水樹交加
柴門半掩人奚到
五里牌邊三四家

永春路

路行僻處山山好
春到晴時物物佳
秀色連雲原上麥


清香夾道刺桐花

秀峰寺

籃輿晚泊近巖隈
精舍門臨古道開
僧子相逢便相識
十年三過秀峰來

連江官湖

衆山圍繞淥團圓
官木參差古道邊
行盡濃陰今不了
一湖飛雨帶輕煙



宋詩鈔卷八十七

欽定四庫全書

集部
宋詩鈔卷八十八

詳校官中書_臣賈錢

主事銜_臣徐以坤覆勘

總校官編修_臣王燕緒

校對官中書_臣劉源溥

騰錄監生_臣鄭家屏

欽定四庫全書

宋詩鈔卷八十八

內閣中書舍人吳之振編

黃公度知稼翁集鈔

黃公度字師憲閩之莆田人紹興八年進士第一任
簽書平海軍節度判官代還除秘書省正字秦檜以
公度與趙丞相鼎善不悅小人希檜意論公度著私
史以謗時政罷歸主管台州崇道觀初公度赴潮道

過分水嶺有詩云鳴咽泉流萬仞峰斷腸從此各西
東誰知不作多時別依舊相逢滄海中及公度歸莆
趙丞相先已謫潮陽小人傳會其說謂此詩指趙而
言將不久偕還中都也檜益怒以惡地處之通判肇
慶府事攝守南恩檜死召除尚書考功員外郎無何
疾卒林大鼎誌其墓謂詩效杜甫古律格句法逼真
洪邁謂精深而不浮於巧平澹而不近俗其悲秋句
不知謫僊少陵以還大歷十才子尚能窺其藩否要

皆過情唯陳俊卿謂雖未盡追古作要自成一家其
言為差近云

正月晦日寄宋永兄

萬事縈心空歲月一分春色已塵埃簷間雨脚何時斷
陌上遨頭幾日來寒東幽花如有待風延啼鳥苦相催
明年此會各南北趁取官閒共酒杯

春日懷王慶長

夜雨纔霑地朝暉已照牆潤畦舒菜甲暖樹折茶槍牧

騎潛沙磧關河息戰場王孫緣底事萍迹久他鄉

悲秋

萬里西風入晚扉高齋悵望獨移時迢迢別浦帆雙去
漠漠平蕪天四垂雨意欲晴山鳥樂寒聲初到井梧知
丈夫感慨關時事不學楚人兒女悲

送鄭察推叔友罷官之潮陽二首

官達身何補才名陸未沉不妨吾道在休較吏文深城
郭春將暮風雲晚更陰相看炎海濶魂斷欲分襟

春草故人去落花離緒多芙蓉少顏色蒼苔盡風波塵
土非長策功名一醉歌周南暫留滯莫改歲寒柯

陳晉江以壬戌四月上澣宴同僚于二公亭

百年遺址俯郊坰十里蒼波帶古亭隔岸樓臺春去遠
兩湖烟雨酒微醒苔碑缺落庭松老野鳥去來汀草青
風物不殊天竺路扁舟髣髴舊曾經

秋旱熱甚尤苦登陟輿中戲成

少皞不用事八月猶苦熱南方本炎蒸况乃甘澤闕雨

師弛厥職旱魃逞餘孽金石鑠欲流汙池龜甲裂稼穡
亦已休田家生理絕敢意築場圃漸聞罌瓶竭祖歛數
有恒不為愆陽輟州縣急鉤鉞鞭箠動流血吁嗟號帝
閭此語何由徹空村巫覡舞靈祠香火謁水旱制於天
祈禳恐虛設嘗聞桑林禱爪犧亦清潔萬國幾為魚堯
德豈其劣但令備先具難必沴氣滅江淮十萬兵仰口
資餽輒太倉無宿儲有司憂百結腐儒從薄宦籃輿走
嵎嶠王事有嚴程亭午不得歇林鳥呀無聲僕夫屢告

暘馬得變玄冬陰厓踏層雪

惜別行送林梅卿

大鼎

赴闕

刺桐城邊桐葉飛刺桐城外行人稀客來別我有所適
問客此去何當歸林卿妙齡才秀發胸中萬卷涵溟渤
家聲合沓蓋九州里第嶙峋表雙闕竭來試吏天南方
驥繫馬能騁所長梅僊脫身東市卒杜老把筆中書堂
傳道淮壖減豺虎政須禮樂事明主之子軒軒霄漢姿
好向春風刷毛羽

還家

黎明呼羸僮拄策渡野水輕嵐翳初日古道步平砥麥
隴黃四出松竹翠相倚人間春告盡巖色秀未已眼入
故鄉明語還親舊喜印非朱買臣金無蘇季子竊笑免
妻孥相過動隣里富貴豈吾謀薄游聊爾耳

暮春宴東園方良翰

喜

有詩入夏追和

要洗襟懷萬斛埃一尊相屬莫遲回顛狂柳絮將春去
排比荷花刺水開懶矣宦情甘冗長拙於句法強追陪

人生行樂須閒健千古朱顏同一類

道間即事

花枝已盡鶯將老桑葉漸稀蠶欲眠半濕半晴梅雨道
乍寒乍暖麥秋天村壚沽酒誰能擇郵驛題詩盡偶然
方寸怡怡無一事麤裘糲食地行僊

白沙夜聞灘聲

錯認松風萬壑傳又如急雨碎池蓮青燈孤館元無寐
况復溪聲到枕邊

和泉上人

芒鞋踏遍萬山松
得得歸來丈室中
破衲一身在懸磬
清談對客似撞鐘
名家要看驚人舉
覓句何須效我窮
春雨地爐分半坐
便疑身住古禪叢

題白沙鋪

負郭可無三頃秫
蓋頭幸有兩間茅
還鄉且盡田家樂
舉世誰非市道交
村酒一杯澆磊塊
山程數驛更磽嶇
羸驂莫怪歸鞭急
心在輕紅荔子梢

送陳應求赴官

莫辭酒且聽歌休被驪駒白玉珂主人勸客終今夕明
日長亭可奈何金風蕭蕭塵餘熱砌蟲唧唧助淒切此
時景物不勝愁況是離人心欲折陳侯陳侯貌巖巖而
俊整才浩浩而清絕有如壺山之萬仞噴吐壽水之千
尋瑩澈青芝赤箭藥籠儲金鐘大鏞廊廟須天生奇才
為時出容易棄擲天南隅君不見馬賓王新豐一逆旅
又不見公孫弘菑川一老儒逢辰立談取卿相至今文

采照天衢廣文官舍雖落莫刀筆不與俗吏俱公餘更
勤五車讀未必不是北門西掖之權輿刺桐古城花欲
燃舊遊人物想依然憑君到彼訪二陸向道故人飽飯
度殘年

送弟童士季赴永春

贈君以宣城秋兔之穎佩君以嶧山焦尾之琴餞君以
顯父清壺之酒送君以安仁金谷之吟筆傳洙泗之正
印琴彈單父之遺音酒以陶百里醇釀之化詩以寫一

時離別之心門前車馬氣駸駸黃葉飛翻秋正深風雨
對床連夜語江山異地欲分襟憶昔聯名唱行殿一日
聲華九域遍自知無用甘林泉君亦何為尚州縣君今
未用歎滯留丈夫勲業要晚收信臣千載循吏傳密令
當年褒德侯高才所蒞無金牛民自不冤吏早休倘免
誅求急星火行看寇盜盡鉏耰

西郊步武地春將老矣不能一往朝吉妣今日為
遨頭澁雨大作非惟人心難并止或尼之枕上

得小詩資宋永兄一喙因呈昔遊兄弟速尋舊
盟勿為天公所玩

無復西郊訪綺羅任教佳景去如梭殘杯冷炙何曾夢
亂絮飛花積漸多舉世盡從忙裏過幾人能共醉時歌
不辭作意營春事急雨狂風可奈何

唱和盈軸而燕集未期小詩請廣文兄為遨頭
煩君管領東君手收拾風光尊俎中與作遨頭共春燕
何須擁鼻學秋蟲誰憐老子興不淺自笑窮人詩轉工

趁取身閒酒價賤明年此日又西東

宋永凡一訪青帝而黃婆作惡累日戲作小詩問安
鳴鐘伐鼓南山阿傾城車馬相憂摩萬釭高下照朱碧
百堵往來紛綺羅身入醉鄉顏紅玉月明歸路湛金波
挽君一出卧三日奈此陌上春光何

贈泉守趙表之

令於

扁舟昔艤浙江邊曾醉王孫玳瑁筵竹杖芒鞋晚城上
金荷銀燭夜堂前官遊我輩聊復爾聚散人間亦偶然

誰料天涯今八載青燈相對各華顛

春日宴共樂堂

畫棟朱甍插紫清連山帶水自紆縈
閭閻高下魚鱗比田畝縱橫碁局平
花發鳥啼春耐事夜闌客散月多情
寸陰自古千金重一笑人間萬慮輕

題瘦牛嶺

自笑年來為食謀扶攜百指過南州
時平四野皆青草此地何曾解瘦牛

謝傳叅議彥濟

雪

惠笋用山谷韻

北方九月霜賓盤無生菜嶺南信地暖窮冬竹萌賣君
念庾郎貧蠶粟供庖宰中有歲寒姿真時久不壞前身
渭川侯千畝償宿債玆可配天花賤不數石芥早薤與
晚菘奴僕望賓介文園酒渴餘想不厭姑噉預恐吹作竹
明日東風噫急須驅兒童傾筐攜采采

題潮陽石塔寺

投檄真成出瘴鄉
籃輿漸喜到僧坊
長風解事吹江雨

金瓶梅詞話卷八十八
乞與行人五月涼

題師吳堂

夫子賢堯舜老彭嘗竊比郊子及師襄下問曾不耻河汾一書生自謂聖復起西京投閣士敢與孟軻齒古人取名廉後人取名侈誰知今人中復見古君子方君帥南越千載少倫擬燕居榜師吳一謙具四美隱之經石門得名一杯水伯始萬事優可但清而已官曹服公德廉仁革貪鄙民俗陶公淳化厚勝姦兇蠻獠畏公威折

筮制千里老猶憚公明束手敢干紀三城有餘力一堂
仍舊址裘帶自清閒賓僚多燕喜惟昔開元相勲業照
青史胸蟠活國計試手曾向此我公廊廟具勞外亦久
矣尺一趣歸裝高蹈廣平軌

西園招陳彥昭同飲

稻粱未飽且紛紛鴻鵠低徊雞鶩羣萬里歸心閩嶠月
十年旅夢瘴溪雲隣諳好事頻賒酒家不全貧甯賣文
未用天涯歎離索一尊滿意說桑榆

秋城晚望

斷續悲笳起麗譙
冥冥晚色四山椒
隔江人散虛分米
十里津喧蜚趁潮
夕照含山心悄愴
西風動地鬢飄蕭
低頭自笑微官縛
東望滄溟歸路遙

恩平燈夕憶上都舊遊呈座客

千尺鰲山面紫宸
豪華曾見夾城春
至今魂夢釣天奏
投老宦遊窮海濱
隨分尊罍奉佳客
記時燈火照嚴闥
年來大覺歡情減
聊與風光作主人

乙亥歲除漁梁村

年來似覺道途熟老去空更歲月頻爆竹一聲鄉夢破
殘燈永夜客愁新雲容山意商量雪柳眼桃腮領畧春
想得在家小兒女地爐相對說行人

宋詩鈔卷八十八